

Dals skis sin il plazzal

Il skiunz Ambrosi Hoffmann è sa retratg

DA GION NUTEGN STGIER / ANR

■ **Suenter 228 cursas dal Cup mundial da skis terminescha il skiunz grischun Ambrosi Hoffmann sia carriera. En sia carriera è il skiunz che vegn en diesch dis 35 onns stà classa gist 48 giadas en ils «top ten», dentant mai il pli sisum dal tut.** Cun *Ambrosi Hoffmann* sa retira dal sport d'elita sper *Didier Cuche* in ulteriur skiunz svizzer da las disciplinas rapidas. Cuntrari al skiunz dal chantun Neuchâtel ha il skiunz grischun cuntanschì en sia carriera da skis da 16 onns nagina victoria. Tuttina dastga *Ambrosi Hoffmann*, da blers er numnà «*Amba*», far ina bilantscha positiva dals blers onns sco commember dal cader naziunal da skis. En il ravugl dal circus da skis era l'atlet da Tavau popular, ina persuna da paucs plets e da bun character. Enconuschent era dentant er ses umor plitost sitg, cun il qual *Ambrosi Hoffmann* ha guadagnà anc dapli la simpatia dals fans e da ses amis da squadra. Ussa curt avant ses 35. anniversari ha il skiunz grischun decidi da terminar sia carriera activa. El sa legra d'avair dapli temp per sia famiglia, per sia dunna, ses dus uffants e d'avair dapli temp per dar golf. Plaschair ha *Ambrosi Hoffmann* però er da pudair far part da la fatschenta da construcziun da ses bab a Tavau, nua ch'el vegn a lavurar en l'avegnir.

Trais gieus olimpics e tschintg campiunadis mundials

Entschet sia carriera en il Cup mundial da skis ha *Ambrosi Hoffmann* ils 6 da mars 1996 e pauc temp suenter è el vegnì a Hoch-Ybrig campiuin mundial dals juniors en la cursa rapida. Dal 1996 fin tar la fin da sia carriera activa è il skiunz grischun stà da la partenza a 228 cursas internaziunalas. Da quellas cursas èn gist 134 stadas cursas rapidas. Sin fundament da quel dumber era *Ambrosi Hoffmann* actualmain il terz vegl skiunz suenter *Didier Cuche* e *Patrik Järbyn*. En sia carriera activa da 16 onns ha il skiunz grischun appartegnì trais giadas al team svizzer tar gieus olimpics. Tar in da quels il 2006 a Torino ha lura *Ambrosi Hoffmann* er gi ses pli grond success. En il super-G ha il Grischun fatg la medaglia da bronz e be *Kjetil André Aamodt* da la Norvegia e *Hermann Maier* da l'Austria èn stads



Suenter 16 onns sport d'elita è il skiunz grischun *Ambrosi Hoffmann* sa retratg.

FOTO PHOTOPRESS

pli sperts. Tschintg giadas è il skiunz grischun er sa participà al campiunadi mundial ed il 2003 tar il super-G a San Murezzan ha el mantgantà be per quatter tschientavels la medaglia, cun esser *Bode Miller*, (USA), *Hermann Maier* (A) e *Stephan Eberharter* (A) pli svelts. Dentant er tar las cursas dal Cup mundial da skis è *Ambrosi Hoffmann* vegnì savens quart. Gist quatter giadas il quart post ha el cuntanschì tar la cursa rapida dal Lauberhorn. Il pli sisum

il podest è *Ambrosi Hoffmann* dentant mai stà ils ultims 16 onns. Sis giadas è el stà sin il podest e da quellas duas giadas tar las cursas da Kitzbühel. Il pli dattiers a la victoria è *Ambrosi Hoffmann* stà il 2002 tar la cursa rapida d'Altenmark nua ch'el è vegnì segund davos *Stephan Eberharter*. Tut en tut sajan quels 16 onns stads in super temp, ha il skiunz grischun ditg venderdi, quel di ch'el ha publitgà la fin da sia carriera activa.